

GOVERNMENT OF
MEGHALAYA



A.H. & VETERINARY
DEPARTMENT



KA RUKOM RI SNIANG

1. **Ka jinglamkhmat.** 2
2. **Ki jait sniang ba ri ha Meghalaya.** 2 – 4
3. **Ka rukom jied ia ka jaka ban shna ia ka sem.**4
4. **Ka rukom shna sem sniang.**4 – 6
5. **Ka rukom pynshongkha bad jied sniang symbai.**6 – 7
6. **Ka rukom sumar ia ki sniang.**8 – 9
7. **Ka rukom ai Bam ia ki sniang.** 9 – 11
8. **Ki jingpang ha ki sniang bad ki lad jingiada.**11 – 14
9. **Ka bhah ai Tika ha ki sniang.** 14 – 15
10. **Ka rukom buh ia ki Register.** 15

1. KA JINGLAMKHMAT

Ka Ri-sniang ka dei ka rukom kumno ba ngi pynroi, ai bam, ri bad sumar ia ki sniang bad ka dei kawei na ka bynta jong ka tnat Ri-Jingri.

Ka kam ri sniang ka dei kawei ka lad ban pynmih doh, na ka daw ba ki sniang ki lah ban kha bun, ki stet ban heh kloï ban ia nujor bad kiwei ki jingri bad ki lah ban pyn kylla bha ia ka bam jong ki sha ka doh. Ka ri sniang ruh ka dei kawei ka jait kam kaba iahap bha sha ki thain nongkyndong lane khap sor.

Wat lada ka jingsdang ka baiseng ka long ha ka dor kaba rit hynrei ki nongri sniang ki lah ban ioh nong bha namar ki sniang ki long ki mrad kiba lah ban kha bun tylli ki khun shisien kha 8 – 12tylli bad ki kha arsien ha ka shi snem. U sniang ruh u ai 70 – 80% ka doh ynda lah dep pyniap ban bam doh bad ki ai jingmyntoi ym tang ka doh hynrei wat ka sboh ban thung jingthung bad ban ai bam ia ki dohkha ha ki pung dohkha.

Ia ka kam ri sniang, ki briew bym nang ka thoh ka pule, ki ba nang ba stad bad ki kynthei sha ki thain nongkyndong ki lah ban ri ia ki sniang pynkha ne ki sniang bam doh.

2. KI JAÏT SNIANG BA RI HA MEGHALAYA

Ki sniang khasi la ju lap kham bun sha ki thain nongkyndong ne khap sor, hynrei ha ki por ba mynta la shem ba kham bun ki ba ri sniang ki ri da ki sniang shiteng /Cross Bred.

1. **Hampshire**– Kine ki sniang ki donki shkor ba ieng, ka met ka baiong bad ka jingthoh ba lieh pyllun ia ka met, ba tap shaduh ki kjat ba shakhmat. Ki dei ki jait sniang ba dap doh bha bad ka jingkhia ha ki sniang shynrang ka kot haduh 250kg bad ki sniang kynthei haduh 200kg. Ki lah ban kha 8 – 10 tylli ki khun sniangshisien kha.



2. **Large White Yorkshire**– Kidei ki jait sniang baheh bad ki long rong lieh lane pink, ki don ki shkor ba ieng bad ka jingkhia ha ki sniang shynrang ka kot haduh 300 – 350kg bad ki sniang kynthei haduh 250 – 300kg ki lah ban kha 10 – 12 tylli ki khun sniang shisien kha.



3. **Landrace**– Ki dei ki jait sniang ba jrongbad ka rong jong ki ka long rong lieh. Ka khlieh ka long jrong bad ki shkor ki long ki ba heh bad noh shaduh sha jan ka khmut. Ka met ka kham long at bad ki dei ki jait sniang ba kha bha. Ka jingkhia ha ki sniang shynrang ka kot 300 – 400kg bad ki sniang kynthei haduh 250 – 320kg. Bad ki lah ban kha 10 – 12 tylli ki khun sniang shisien kha.



4. **Duroc**– Kineki long rong saw ktieh bad ki long dap doh, ki shkor ki long nohbad ka jingkhia ha ki sniang shynrang ka kot haduh 250 – 300kg bad ki sniang kynthei haduh 250 – 300kg. Ki lah ban kha 8 – 10 tylli ki khun sniang shisien kha.



5. **Ghungroo**– Kine ki jait sniang ki long rong iong bad ka dur khmat kum ki ksew–bull dog. Ka jingkhia ha ki sniang shynrang ka kot 300 – 350kg bad ki sniang kynthei haduh 250 – 350kg. Ki lah ban kha 8 – 12tylli ki khun sniang shisien kha.



6. **Tam worth bad Desi Cross**– Kine ruh ki long rong iong bad ki don ki shkor ba noh khyndiat, ka jingkhia ki sniang shynrang ka kot 190 – 240kg bad ki sniang kynthei haduh 160 – 200kg.Ki lah ban kha 8 – 12 tylli ki khun sniang shisien kha.

7. **Niangmegha**– Kine ki dei ki sniang jong ka Ri lum khasi,Jaintia bad Garo jong ka jylla Meghalaya.La ri ia kine ki sniang na ka bynta ka doh bad u shniuh.Kine ki jait sniang ki don ka dur kum ki sniang khlaw bad u shniuh ba ieng ha ka bynta jong u budlum bad ki shkor ki long ki barit bha.Ki lah ban kha tang 5 – 6tylli ki khun sniang shisien kha.



3.KA JINGJIED IA KA JAKA BAN SHNA IA KA SEM:

1. Ka nongrim ing jong ka sem sniang ka dei ban long kham halor ban lait na ka jingshlei um ha ka porlap.
2. Ka jaka ban shna ia ka sem ka dei ban lait na ka jingshoh jong ka sngibaddei ban thung tawiar da ki dieng ban ioh ka lyer kaba khuid.
3. Ka jaka ka dei ban jngai na ki ing shong briew.
4. Ka dei ban biang ka surok kali ban suk ka leit ka wan.
5. Ka dei ban don ka jaka ban bret ia ka sboh sniang,ka um bad ka light ka dei ban biang.

4.KA RUKOM SHNA IA KA SEM SNIANG.

1. Ka rukom shna ia ka sem sniang ka shong kat kum ka jinglong jong ka suinbneng ha ka jylla.
2. Ia ka sem sniang dei ban shna ha kata ka rukom ba ka lynter kan phai Mihngi –Sepngi.
3. Ka madan jong ka sem sniang ka dei ban long kaba skhem, bad lait na ka jing jrein um,sngem bad suk ban pynkhuid ia ka.

4. Ka madan jong ka sem sniang dei ban siang da ka dewbilat bad dei ban pynnoh ia ka madan sha ba don ka nala.
5. Ka tnum dei ban shna da ka asbestos/saraw bad ka dei ban iada na u slap.
6. Ka sem sniang ka dei ban biang ka rukom ioh lyer,ka dei ban long pynngad bad lait na ka jingsma bad sngem.
7. Donkam ban da bud pyrkhing bha ia ki lad jingiada ha ka farm sniang.Dei ban shna ka jaka ban wieh ia ki kjat(Footbath) ha ka jaka ban rung ha ki sem sniang ba don ka dawai Phenyl lane Potash ba la khleh lang bad ka um.
8. Ia ka sem sniang lah ban shna ha ki ar bynta,kawei ka bynta kaba shapoh kaba ki khot ka **Pen** baki sniang ki thiah mynmiet bad ka bynta kaba shabar ba ki sniang ki thiah ne dem kai mynsngi kaba ki khot ka **Run**.
9. Ka sem sniang la phiah ha kane ka rukom harum.
 - Sem Sniangkmie.
 - Sem Sniang kpa.
 - Sem Snianglud/Bym ai buin khun.
 - Sem Kha khunsniang.
 - Sem Pynsngaid.
 - Sem buh ia ki khun sniang ba lah kein buin kmie.
 - Sem ba buh ia ki ba Pang.

KA JINGHEH JONG KA SEM NA KA BYNTA KI SNIANG KA LONG KUMNE HARUM:

Sl no	Ki Sniang	Jaka ba tap/uwei/m2	Jaka ba Plied/uwei/m2
1	Sniangkpa	6.25 – 7.5	8.8 – 12
2	Sniang pynsngaid	6 – 1.8	8.8 – 12
3	Sniangkmie	7.5 – 9	8.8 – 12
4	Snianglud/ bym ai Buin khun.	1.8 – 2.7	1.4 – 1.8



Jaka na ka bynta ki Sniangkhu/Creep Space – Kane ka dei ka jaka ha kaba ki sniang khun ki lah ban rung. Dei ban shna ha ka jaka ba kyndong jong ka sem sniang bad siang da ki lyntang 25 – 30cm ka jingjrongo na ka madan. Dei ban ai bad ka jingpynsyaid ha kane ka jaka na ka bynta ki khunsniang. Donkam ban ker ia kane ka jaka da ki pipe bala shna 25 – 30cm ka jingjngai na ka madan khnang ba ki khun sniang kin ioh ban rung ban mih na kine ki jingker, lada ka kmie ka thiah ban lait ka jingshah ban haka.

5. KA RUKOM PYNHONGKHA

Don bun rukom kumno ban pynshongkha ia ki sniang, kine ki long kumne harum:

- 1. Pure Breeding**– Kaneka dei ka rukom ban pynshongkha da u sniangkpa bad ka sniangkmie na ka juh ka jait, kane ka iarap ban pynneh ia ka jinghiar pateng.
- 2. Cross Breeding**– Kaneka dei ka rukom ban pynshongkha ia ka sniangkynthei na kawei ka jait bad u sniang kpa na kawei ka jait. Kane ka iarap ban kha kham bunki sniang khun bad kloian ban heh ban san.
- 3. Grading up**– Kaneka dei ka rukom ban pynshongkha ia ka sniang shnong bad u sniangkpa na ka jait Yorkshire ne Hampshire. Kane pat ka iarap ban kham pynbha ia ka jingioh pateng ki khun sniang na ki sniang heh.
- 4. Artificial Insemination**– Kane ka dei ka rukom ai kpa da ka ba shu thep da u symbai jong u sniang kpa ba bha ha ka sniang kmie ynda ka lah wan jingkhlood. Kane ka rukom ka iarap ban kha ia ki khun sniang ki ba bha, ka iarap ban pynneh ia ki symbai ba bha bad ka kham duna dor ban ia kaba buh da u sniangkpa.

POR BAN SHONGKHA:

- Por ba wan ka jingkhlood: man ka 18 – 24sngi.
- Ka jingneh ka jingkhlood: 2 – 3sngi.
- Katno sien ai kpa: 2 sien hapdeng 12 – 24kynta.
- Rta ban pynshongkha ia ka nianglood: 8 bnai (Kan bha lada ai kpa ha ka sien ba ar ba wan jingkhlood).
- Por pun: 114sngi.
- Ka jingwan jingkhlood ynda lah kein noh buin ia ki khun: 2 – 10sngi.

RUKOM JIED IA KI SNIANG SYMBAI:

Ki mat kiba donkam eh ban khmih bha ha ka por ba jied ia ki sniang symbai ki long kumne:

- Jingkha bun tylli,rukom ba pynioh dud ia ki khun,ki symbai ba heh kloï, kiba pynmih ka doh ba kham bha,kiba kha ki sniang ba shait ba khlain bad lait na ka jingduna ha ki dkhot met.
- Ka jingjied ia ki sniang symbai na ki kynhun sniang ba bha ka kham lah ban ia kaba jied na ki jait sniang.
- Don ki jait sniang kiba biang bha ha ka jingkha ki sniang,tangba ym don ki jait sniang kiba biang lut.

RUKOM JIED IA KA SNIANG LUD

- Ka rukom jied ia ka snianglud na ka bynta ban pynkha dei ban jied ynda ka lah khia 90 kg.
- Ia ka snianglud dei ban jied na ka sniangkmie kaba lah kha bunsien,kha bun tylli ki khun sniang khun bad kiba kiewbha ka jingkhia ha ka por ban die ia ki.
- Ka snianglud ka dei ban lah bha ban pynkylla ia ka bam sha ka doh.
- Ka snianglud ka dei ban don 6 jur ki soh jymbuin.

RUKOM JIED IA U SNIANG KPA

- Dei ban jied ia u sniangkpa uba khia kumba 90 kg hapdeng ka rta ba 6 – 7bnai.
- U sniangkpa u dei ban long uba khlain bad ryntih ki kjat.
- Ia u sniangkpa,dei ban jied na ka sniangkmie kaba lah kha bunsien bad bun tylli ki khun sniangshisien kha.
- U sniangkpa u dei ban don ka met ka phad ka ba biang bad ba dap doh ksah.



6.KA RUKOM SUMAR IA KISNIANG.

6.1. KA RUKOM SUMAR IA U SNIANG KPA

- Ia u sniangkpa dei ban set ha ka sem ba marwei.Ka sem ka dei ban long kaba khuid,rkhiang bad ioh lyer bha bad lait na ka jingsngem.
- Ym dei ban ai bam bun palat ne pynduna bam palat namar kane ka lah ban ktah ia ka jing shongkha.
- Ia u sniangkpa ym dei ban pynshongkha lada um pat tam ia ka 8 bnai bad ym dei ban pynshongkha palat ia ka shisien ha ka shisngi.
- Dei ban ialeh ban pynkhap ia ki tyrsim kjat jong u, ban lait na ka jingdkoh.
- Dei ban khap ia ki bniat jong ki sniang balah heh ban lait ban mynsaw ka sniang lane ki nongsumar.

6.2. KA RUKOM SUMAR IA KA SNIANG KABA ARMET

- Ka sniang ba armet dei ban buh laka jong ka sem.
- Ka sem ban kha khunsniang ka dei ban long kaba khuid bad sait da 2% ka phenyl shitaiew shwa ba kha ka sniang.
- Ia ka sniang ba armet dei ban pynkynriah kumba ar taiew shwa ba kan khabad ka sem ka dei ban long kaba rkhiang bad ioh sngi bad lyer.
- Ai bam khambun ia ka sniang ba armet, khnang ba kan kha ki khun sniang ba shait ba khlain.
- Ai dawai calcium iaka sniang kmie 10 sngi shwa ba kan kha.
- Kham pynbun da u skop kew 3 sngi shwa ban kha badsiang ia ka jaka thiah da u phlang ne skum.
- Pynduna noh ka bam ynda ka lah jan kha.

6.3. KA RUKOM SUMAR IA KI SNIANG KHUN

- Ia ki khunsniang mar sien kha,niad pynkhuid ia ki da ka jain khuid,khnang ba kan khuid ka khmut ban ring mynsiem.
- Sa buh ia ki ha ki jaka pynsyaid(creep area)haduh ynda lah dep kha lut baroh.
- Ia u sohpet dei ban teh 2.5cm na ka kpoh,sa ot da ka khanshi bad sa tah da ka dawai iodine ia ka jaka ba la khap.

- Ot ia ki 2 jur ki bniat banep ba don ha ka tyngam ba shajrong bad shapoh mar sien kha,khnang ban lait pynmysaw ia ki sohbuin ka sniangkmie bad ia ki khunsniang dei ban shah ba kin tan dud ynda lahdep khap ia ki bniat.
- Ka jingshah ban ha ka sniangkmie dei ban kiar hapoh ka 2 taiew.
- Ia ki sniangkhun dei ban khap bad ai dak(Ear tagging) ha ki shkor mar sien kha.
- Ban iada na ka jingduna snam ha ki khun sniang,pyndih lane tah da ka dawai ferrous sulphate man ka sngi haduh 5 – 6taiew ha ki sohbu jong ka kmie, lane ai da ka injekshon, Iron dextran ha ka sngi ba 3 bad 14.
- Pyniakhlad ia ki khun na ka kmie ynda ki lah dap 7 – 8taiew.Dei ban sdang da kaba weng ia ka kmie na ka sem, katto katne kynta man ka sngi,shwa ban pyllait ia ki khunsniang ban lait na ka jingsngew pher ka jaka kaba ktah ia ka jingheh,jingsan jong ki.
- Ki sniang khun ba lah iap kmie lah ban ri da kaba buh bad kiwei ki sniangkmie ba dang lungkhun, lane ai da ka dud masi.



6.4. RUKOM SUMAR IA KI SNIANG LUD

- Ia ki snianglud dei ban set ia ki kat kum ka jingheh jong ki.
- Ka jaka set ia ki ka dei banlong kaba kylluid ban lait na kajing ia dait tdong para maki.
- Ia ki sniang dei ban ai dawai wieh artaiew ynda lah kein noh buin,ban lait na ka jingbun wieh.
- Ia u jingbam khun sniang dei ban pynkylla noh da u jingbam jong ki snianglud.Ia ki snianglud dei ban ai ka tika Swine Fever.

7.KA RUKOM AI BAM IA KI SNIANG

Ka dei kawei ka mat kaba kongsantam na ka bynta ban ioh ki sniang ki ba shait ba khlain.Ki jait jingbam ba ngi



bsa ia ki sniang ruh ka iarap ia ki ba kin kham heh kloï,ba kin khie samla biang por,ba kin kha bun tylli ki khun sniang,ban pynmih ka dud ka ba bha bad bun,ban lait na kaba ioh pang bad ka doh kaba bangbha.

KI MAT BA DONKAM

- Ka jingai jingbam khyllung ia ki khun sniang ka iarap ba kin heh kham kloï bad duna ka jingiap.
- Ia ki khun sniang dei ban sdang ban pynmlien ban ai jingbam naduh ba ki dang dap lai taiew,namar ka jingmih ka dud na ka kmie ka hiar noh naduh lai taiew hadien ba la dep kha.
- U jingbam khun sniang u dei ban bun ka protein bad ka vitamin bad dei ban duna ka jingbam ba bun ksai palat/fibre.
- Ia u jingbam khyllung ai ia ki sniang ba khia 5 – 15kg.
- Ia u jingbam khyllung sa pynkynriah sha u jingbam snianglud ynda ki sniang ki lah khia 15kg.
- Ia ki sniang kpa bad sniang kmie dei ban ai bam ia ki ba kin khie ki san bha bad ym dei pat ba kin sngaid palat.
- 4 – 5 sngi shwa ban kha ka sniang kmie dei ban pyn duna ka bam,shiteng na ka ba ju ai manka sngibad pynbun da u skop kew ha ka jingbam.
- Ki sniang ba dang lung khun ki bam 4 – 7kg ka bam ha ka shisngi bad ki donkam 14 – 20litre ka um ha ka shisngi.

Jingbam	Jingbam khyllung haduh ban da kein buin	Jingbam snianglud (15-40Kg)	Jingbam ba pynsngaid (40-90Kg)
Protein%	18 – 20	16 – 18	13 – 14
	6 – 8	4	2
Grains%	60 – 65	50 – 55	40 – 55
Wheat bran %	5	10	20
Mineral mixture%	0.5	0.5	0.5
Antibiotic/Dawai khlain(mg)	40	20	10

KA BHAH AI JINGBAM KAT KUM KA RTA BAD JINGKHAIA

Rta(Bnai)	Jingkhia(kg)	Bhah ai jingbam ha ka shisngi	Jaitjingbam
2 – 4 taiew	2 – 5kg	50 – 100gm	Jingbam khyllung
1 – 2 bnai	5 – 15kg	200gm – 500gm	Jingbam khyllung
2 – 3 bnai	15 – 22kg	500gm – 1kg	Jingbam 'nianglud
3 – 4 bnai	22 – 30kg	1kg – 1.5kg	Jingbam 'nianglud
4 – 5 bnai	30 – 40kg	1.5kg – 2kg	Jingbam 'nianglud
4 – 6 bnai	40 – 55kg	1.5kg – 2.5 kg	Jingbam pynsgaid
6 – 8 bnai	55 – 80kg	2.5kg – 3.5 kg	Jingbam pynsgaid

8. KI JAITJINGPANG BAD KUMNO BAN IADA

8.1 PARASITIC INFECTIONS

1. **Ascaris/Wieh pyllun** – Kine ki wieh ki im ha ka kpoh bad snier jong ki sniang bad dei na ka jingdon kine ki wieh ba ki sniang kim heh bad raikhoh beit. Ka jingioh ia kine ki wieh ka dei lyngba ka jingbam ia ki pylleng wieh ba don ha ka jaka ba jakhlia kum ha ka jingbam, khyndew bad jhur.

Ki Dak – Ymkwah bam, duna snam bad ki raikhoh.

Ki lad jingiada – Aidawai wieh.

2. **Tapeworm/Wieh stang/Niangstar** – Kineki wieh ki stang bad long kum u ribbon, ki im ha ka snier jong ki sniang.

Ki Dak – Sukika jingsan, u shniuh u bym itynnad, ki jingduna snam bad raikhoh.

Ki lad jingiada – Aidawai wieh.

3. **Mange/Niang sakhoid** – Kikhniang ba rit bha ba ki khot ki Mites, ki im ha ka snieh doh jong ki sniang bad kine ki wanrah ia ka jingdait jong ka met.

Ki dak – Kajinglong rben ka sniehdoh, hap shniuh bad u shniuh um itynnad ne phyrnai.

Ki lad jingiada – Kajingleh khuid ha ka sembad ki jingri. Ai da u Ivermectin.



4. **Maggots/Boi ksain** – Ki skain ki kha ksain ha kano kano ka jaka bamong bad kineki ksain ki bam ia ka doh bad pynmong shuh shuh ia ka jaka.

Ki dak – Kajingdait buid ha ka jaka ba don ksain.

Ki lad jingiada –Pynkhuidia ka jaka bamong man ka sngi da ka tincture Iodine bad tah da ka dawai Himax.Ia ki ksain pynkhuid da ka Turpentine oil lane Butox.



8.2 BACTERIAL INFECTION

1. **Leptospirosis** – Kaneka jingpang ka ju wan kynsan bad kaba ia bit bha hapdeng ki sniang.

Ki Dak – Shitmet,duna snam, pang stem,hap khun ha ki bnai ba khatduh,ka jingiap ki khunsniang ba dang shu kha,ka jing khie ring bad iap shilliang.

Ki lad jingiada – Donkamban pynkhuid bha ia ka sem sniang bad ai da ki dawai antibiotic 5 – 7sngi lynter.

- 2.**Mastitis** – Kaneka dei ka jingpang ba ki sohbu jong ka kmie ki sieb bad eh bad ka don ka jingkylla rong ha ka dud bad ka long rben.

Ki Dak – Jingshitmet, ym bang bam, bym lah ring mynsiem bha, ka hiar ka jingpynmih dud bad ki sohbu ki eh bad ka sniang kan ym shah ia ki khun ban buin.

Ki lad jingiada – Ai da ki dawai antibiotic,tah da ka Wisprec ointmentbad ai da u MnM powder.



- 3.**Swine erysipelas** – Kaneka dei ka jingpang ka pyni ki dak ha ka snieh doh ba long saw kum ki mawlynnai/diamond shaped.

Ki Dak – Ka jingiap kynsan,bym bang bam,ka jingjngem jong ka sniehdoh ha ki bynta jong ka kpoh,shkor,tdong bad ryndang.Ka jingpang ha ki mat.

Ki lad jingiada – Aida ki Antibiotic bad injection ban pynduna ka jingktha.



4. **Piglet Diarrhoea/Pynhiar ha ki khun sniang** – Kane ka jingpang ka wan ha ki taiew mar sien kha lane ynda lah ieh noh buin. Kane ka jingpang ka wan ruh lada ka sem sniang ka long kaba jakhlia bad bym khuid bad kam biang ka rukom sumar ia ki sniang khun.

Ki Dak – Ka jingpynhiar da ka um bad ka jingbym lah bam.

Ki lad jingiada – Ialeh ban pynkhuid ia ka sem sniang bad ai da ki dawai pynhiar bad dawai khlain.

8.3. VIRAL INFECTION

1. **Classical Swine Fever/Pang Khlam** – Kaneka jingpang ka ju wan kynsan bad ka ktah ha baroh ki rta ha ki sniang. Ka jingiap ha ki sniang ka bunbha.

Ki Dak – Ka jingshitmet, prie, pynhiar, ka jingjngem snam jong ka khmut, ki shkor bad ki kjat. Ka jingkhie ring bad ka iap shiliang. Ynda lah puid ia ki sniang ba lah iap ki dak kiba paw ki long ka jinglangnam kibarit ha u khyllai bad ki kynja baat kum u budam ha ka nierbah. (Button ulcers)

Ki lad jingiada – Ymdonkano kano ka dawai kaban ai jingiarap lait tang ka tika khlam/Swine Fever vaccine kaban iada.

2. **African Swine Fever** – Kane ka jingpang ka long kaba pur stet haduh katta kattabad kane ka jingpang ka saphriang lyngba ki sniang khlaw kiba rah ia une ukhniang.

Ki Dak – Ka jingshitmet, bymlah khieh shane shatai, ba iaid pawang, jingjngem snamjong ka doh bad lang snam barit ha ki bynta jong ka snier bad kiwei ki doh jem.

Ki lad jingiada – Ym don dawai lane tika ban iada, hynrei dei ban pyrkhing bha ia ka jingrung jingmih ki brieve ne jingri ha ki farm. Ki sniang kiba lah iap dei ban shu tep lane thang. Dei ban pynkhuid ia ka sem da kaba pyndonkam u bleaching powder lane 2% Sodium Hypochlorite.

3. **Japanese Encephalitis** – Kaneka jingpang ka dei ba ki sniang ki ioh naka jingdait jong uskain pyrjong uba kit ia une u khniang bad ktah ha ki mrad bad ki brieve kumjuh bad kaba iabit hapdeng ki brieve bad mrad.

Ki Dak – Ka jingbymlah shah ia ka jingshai, ka jingkhynniuh, ym lah ban ieng bha bad ka jingshitom ban ring bad pynhiar mynsiem.

Ki Lad Jingiada – Ymdon dawai kaba lah ban iada, hynrei tang da kaba ai ki dawai shitmet, dawai khie ring, antibiotics bad ka jingpyndonkam ia ki dawai ban lait na ka jing shah dait ha ki skain pyrjong.

4. **Porcine Respiratory and Reproductive Syndrome** – Ka dak jong kane ka jingpang ka dei ka jing ktah ha ka kha ka pun ha ki sniang kynthei bad ka jingioh pang ki tor ha ki khun sniang.

Ki dak– Kajinghap khun, ka jingkha khlem pat dei por, ka jingbymwan jingkhuid thikna ha ka sniang. Ka jingbym lah ring bad pynhiar mynsiem bha bad ka jingiap kham bun jong ki sniang shwa ban kein buin.

Ki Lad Jingiada – Ymdon dawai ba kyrpang lait tang ki dawai ban pynduna ia ka jingpang kum ki antibiotics. Ka jingleh khuid ha ki sem sniang da kaba pyndonkam da u bleaching powder ne u 2% sodium hypochlorite.

9.KA BHAH AI TIKA HA KI SNIANG

Sl no	Injek iada	Rta ba ai ia ka tika nyngkong	Tika ba ar	
1	Swinefever/Khlam sniang	2bnai shaneng	-	Ai man ka 6bnai
2	Foot and Mouth Disease/Niangkhnep	2bnai shaneng	1bnai hadien ka tika ba nyngkong	Ai man ka 6 bnai

KA JINGDONKAM BAN AI TIKA

- Ban iada na ka jingpang iabit na ki mrad sha ki briew/briew sha ki mrad.(Zoonotic)
- Ban lait na ka jingmih kiwei ki jingpang ba thymmai jong ki mrad.
- Ban ioh ka doh, dud lane pylleng kaba lait na ki jingpang.
- Ban pynduna ka jingai dawai, antibiotics.
- Ban kyntiew ka jingkha bad pynduna ka jingiap.



KA JINGAI DAWAI WIEH HA KI SNIANG.

- Sien ba nyingkong – ynda ki sniang ki la dap 2 taiew
- Ai man ka bnai haduh kin da dap 6 bnai bad sa bud pat man ka 3 bnai.
- Ia ki sniang ba armet, ai dawai wieh 4 taiew shwa ba kin kha.

KA JINGDONKAM BAN AI DAWAI WIEH.

- Ban iada na ki wieh/khniang ba bun jait.
- Iarap ia ki jingri ban lait na kiwei pat ki jingpang.
- Ki jingri ki heh,ki san kloï bad ki ai ka doh ka dud kaba bha.
- Ka iarap ban treikam khambha ia ka Tika.

10. KA RUKOM BUH IA KI REGISTER.

Ka jingbuh ia ki register ka long kaba donkam bha namar ka iarap ban pyntyllun ia ki kam ha ka farm bad ban buh jingkhein ia ka jinglut,jingsep.Ka jingbuh ryntih ia ki register ruh ka iarap ban tip ia ka koit ka khiah ki jingri,ka por ai tika,ai dawai wieh bad shongkha bad kiwei kiwei de.

KI REGISTER BA JU BUH HA KI FARM KI LONG KUMNE.

1. Register ka jingdon ki Sniang ha farm
2. Register ki sniang kmie.
3. Register ki sniang kpa.
4. Register ki snianglud.
5. Register ki sniangkhun.
6. Register ba pynshongkha.
7. Register ba kha khun sniang.
8. Register ba ai dawai.
9. Register ba ai Tika.
10. Register ba die sniang.
11. Register ba ai Bam.
12. Register ba pynlut bad ba ioh.
